

**PENERANGAN INFOGRAFIK RINGKASAN KESELURUHAN
LAPORAN KETUA AUDIT NEGARA (LKAN)
MENGENAI PENYATA KEWANGAN KERAJAAN NEGERI DAN AGENSI NEGERI
SERTA PENGAUDITAN PEMATUHAN AGENSI
NEGERI PAHANG TAHUN 2022**

1. Infografik ini menunjukkan ringkasan keseluruhan bagi buku LKAN Penyata Kewangan Kerajaan Negeri dan Agensi Negeri Pahang Tahun 2022. LKAN ini mengandungi laporan berkaitan Pengesahan Penyata Kewangan Kerajaan Negeri Pahang Bagi Tahun Berakhir 31 Disember 2022; Analisis Kewangan Kerajaan Negeri Pahang serta Penyerahan, Pengesahan dan Pembentangan Penyata Kewangan Agensi Negeri Pahang serta satu tajuk pengauditan pematuhan agensi negeri. Perincian bagi setiap bahagian adalah seperti berikut:

1.1. Pengesahan Penyata Kewangan Kerajaan Negeri Pahang Bagi Tahun Berakhir 31 Disember 2022

- a. Sijil Ketua Audit Negara Mengenai Penyata Kewangan Kerajaan Negeri Pahang Bagi Tahun Berakhir 31 Disember 2022 Tanpa Teguran telah ditandatangani pada 11 Ogos 2023.
- b. Secara keseluruhannya, Penyata Kewangan Kerajaan Negeri Pahang menunjukkan gambaran yang benar dan saksama mengenai kedudukan kewangan Kerajaan Negeri Pahang bagi tahun berakhir 31 Disember 2022. Rekod perakaunannya juga telah diselenggara dengan teratur dan kemas kini.

1.2. Analisis Kewangan Kerajaan Negeri Pahang

- a. Kutipan hasil pada tahun 2022 meningkat sebanyak RM422.01 juta atau 48.7% menjadi RM1.288 bilion. Bagaimanapun, perbelanjaan meningkat sebanyak RM304.89 juta atau 32.7% menjadi RM1.236 bilion pada tahun 2022 berbanding RM931.11 juta pada tahun 2021.
- b. Akaun Hasil Disatukan pada tahun 2022 menunjukkan lebih semasa berjumlah RM92.80 juta. Lebih pada tahun 2022 meningkat sebanyak RM86.94 juta atau 1,483.6% menjadi RM92.80 juta berbanding lebih RM5.86 juta pada tahun 2021. Lebih terkumpul Akaun Hasil Disatukan terus meningkat menjadi RM263.61 juta atau 54.3% berbanding RM170.81 juta pada tahun 2021.
- c. Akaun Amanah Disatukan pada tahun 2022 menunjukkan peningkatan berjumlah RM16.80 juta atau 3.6% menjadikan baki pada tahun 2022

berjumlah RM486.94 juta berbanding RM470.14 juta pada tahun 2021. Akaun Pinjaman Disatukan pada tahun 2021 dan 2022 berbaki sifar. Baki terkumpul Kumpulan Wang Disatukan pada akhir tahun 2022 berjumlah RM750.55 juta, iaitu meningkat sebanyak RM109.60 juta (17.1%) berbanding RM640.95 juta pada akhir tahun 2021.

- d. Baki Pinjaman Boleh Dituntut menurun sebanyak RM11.34 juta (5.8%) daripada RM196.29 juta pada tahun 2021 kepada RM184.95 juta pada tahun 2022. Jumlah Hutang Awam menurun sebanyak RM2.199 bilion atau 70.8% menjadi RM908.99 juta berbanding RM3.108 bilion pada tahun 2021. Pelaburan Kerajaan negeri pada akhir tahun 2022 berjumlah RM846.46 juta adalah sama seperti tahun 2021.

1.3. Penyerahan, Pengesahan dan Pembentangan Penyata Kewangan Agensi Negeri Pahang

- a. Pengauditan penyata kewangan dilaksanakan terhadap 21 agensi negeri yang terdiri daripada 10 Badan Berkanun Negeri (BBN) dan 11 Pihak Berkuasa Tempatan (PBT).
- b. Kesemua 10 BBN dan 11 PBT telah mengemukakan penyata kewangan bagi tahun berakhir 31 Disember 2022 untuk diaudit dalam tempoh yang ditetapkan iaitu sebelum atau pada 30 Jun 2023.
- c. Setakat 31 Ogos 2023, kesemua 10 BBN dan 11 PBT telah mengemukakan penyata kewangan bagi tahun berakhir 31 Disember 2022 untuk diaudit. Daripada 21 agensi negeri tersebut, 16 agensi negeri mengemukakan penyata kewangan dalam tempoh yang ditetapkan oleh Pejabat Setiausaha Kerajaan Pahang, iaitu sebelum atau pada 30 April 2023. Bagaimanapun, dua penyata kewangan yang dikemukakan tidak lengkap iaitu bagi Perbadanan Kemajuan Pertanian Negeri Pahang dan Perbadanan Muzium Negeri Pahang. Kedua-dua penyata kewangan tersebut dikembalikan untuk pindaan dan telah dikemukakan semula kepada pihak Audit selepas 30 April 2023.
- d. Terdapat lima agensi negeri yang mengemukakan penyata kewangan melebihi tempoh yang ditetapkan iaitu Perbadanan Kemajuan Bukit Fraser, Perbadanan Perpustakaan Awam Pahang, Perbadanan Kemajuan Cameron Highlands, Majlis Perbandaran Temerloh dan Majlis Bandaraya Kuantan. Tiga agensi negeri iaitu Perbadanan Kemajuan Bukit Fraser, Perbadanan Perpustakaan Awam Pahang dan Majlis Bandaraya Kuantan telah memohon lanjutan tempoh penyerahan penyata kewangan daripada Pejabat Setiausaha Kerajaan Pahang

dan telah mendapat kelulusan lanjutan tempoh penyerahan. Baki dua agensi negeri iaitu Perbadanan Kemajuan Cameron Highlands dan Majlis Perbandaran Temerloh tidak memohon lanjutan tempoh penyerahan penyata kewangan daripada Pejabat Setiausaha Kerajaan Pahang.

- e. Setakat 31 Ogos 2023, tiga penyata kewangan BBN telah disahkan. Tujuh penyata kewangan BBN dan 11 penyata kewangan PBT bagi tahun berakhir 31 Disember 2022 masih belum disahkan oleh Jabatan Audit Negara.

1.4. Pengauditan Pematuhan Agensi Negeri Pahang

- a. Pengauditan pematuhan Agensi Negeri Pahang dilaksanakan terhadap Kutipan Hasil Sewaan di Majlis Perbandaran Temerloh (MPT) yang melibatkan hasil sewaan terkurang kutip berjumlah RM12,400.
2. Secara keseluruhannya, sebanyak lapan syor Audit yang diberikan oleh Ketua Audit Negara. Tiga syor kepada Kerajaan Negeri Pahang dan lima syor kepada agensi negeri.

